

Spenda il Grischun propri uschè bler?

■ **(anr/fa) Sin basa da la statistica da l'Administraziun federala per finanzas ha il Grischun suenter Geneva e Basilea las pli bleras expensas per persuna. Possibilitescha questa statistica ina cumparegliaziun interchantunala?**

«Geneva, Basilea ed il Grischun spendan il pli bler» ha dacurt scrit la «Sonntagszeitung». Sch'ins resguarda las expensas statalas totalas per persuna spenda il chantun Argovia cun 10 600 francs l'onn il pli pauc. Il chantun Geneva spenda dapli ch'il dubel, numnadamain 22 617 francs ed il chantun Grischun 18 900 francs. «I dat motivs suandabels ed objectivs pertge ch'il Grischun ha pli grondas expensas che auters chantuns, p. ex. la grondezza da noss chantun relati-

vamain pauc colonisà. Da render accessiblas 150 vals custa fitg bler e sto vegnir finanzià da paucs», di il deputà *Reto Nick* (pld, Tschintg Vitgs). I dettia da tschella vart dentant era l'in u l'auter segn da dumonda, manegia'l. Perquai han el e 62 deputadas e deputads al cussegl grond inoltrà a la regenza ina dumonda: Els vulessan savair co che la regenza giuditgeschia la statistica finanziaria da l'Administraziun federala per finanzas, «è quella statistica adattada per ina cumparegliaziun interchantunala?» Ultra da quai vulessan els era savair co che la regenza decleria la posiziun dal Grischun a la testa da questa statistica tant tar las expensas statalas totalas sco era tar singuls secturs da questas expensas.